

摘藻堂四庫全書薈要

集部

欽定四庫全書薈要

集部

宛陵集卷三十八至四十一

詳校官助教<sub>臣</sub>常循



欽定四庫全書叢要卷一萬四千四百七十八

集部

宛陵集卷三十八

宋 梅堯臣 撰

贈袁大監

人惟知足曷顧百鍾俸今朝西山歸芝朮不須種莊生  
逸老言此必久已誦矩法况自持推年心可縱

依韻和達觀禪師贈別

平生少壯日百事牽於情今年輒五十所向惟真誠既不慕富貴亦不防巧傾寧為目前利寧愛身後名文史玩朝夕操行蹈賢英下不以傲接上不以意迎衆人欣立異此心常自平譬如先後花結實秋共成趙壹雖空囊鄭子豈其卿二人貧且隱高譽動天京我蹟固尚賤我道未嘗輕力遵仁義塗曷畏萬里程安能苟榮祿擾擾復營營近因喪已除偶得存餘生強欲活妻子勉焉事徂征徂征江浦上鷗鳥莫相驚

蕪湖阻風

春風任惡花自笑白浪不愁頭已白  
戢戢大船江浦邊  
崑崙五兩誰非客

依韻和達觀文鑒雨中見懷

出浦候波平石尤風未止密雨長  
蒲芽輕泥隨燕子寒  
侵遠客衣岸起新痕水各各欲還  
山還山能幾里

讀月石屏詩

自此起皇祐三年五月至京後

余觀二人作詩論月石月在天上石在山下安得石上

有月蹟至矣歐陽公知不可詰不竟述欲使來者默自  
釋蘇子苦豪邁何用強引犀角蚌蛤巧擗析犀蛤動活  
有情想石無情想已非的吾謂此石之蹟雖似月不能  
行天成紀歷曾無纖毫光不若燈照夕徒為頑璞一片  
圓溫潤又不似圭璧乃有桂樹獨扶疎常娥玉兔了莫  
覓無此等物豈可靈祇以為屏安足惜吾嗟才薄不復  
詠畧評二詩庶有益

暴雨

雲薄風迴雨點麤日腥土氣隨吸呼蒸然襲汗猶揮珠  
屋瓦裂響波生渠森森斗覺涼侵膚毛根凜瘁粟匝軀  
已知燠寒變須臾雷電不止投笑壺槐端漏影日向晡  
馬蹄莫惜行泥塗

和宋中道喜至次用其韻

予從江南來見子東涌榛問子何不治子兄游洛瀕子  
素樂文字而復養慈親去年始陞朝差差陪縉紳今也  
與吾肩行止笑語頻未經鬢髮改喜預班綴新思如曩

時會浩飲不計巡徃謁持約史文辭媿彬彬謂將一乘  
粟欲敵千箱困然而澤中蛇時得龍一鱗况復周孔教  
幸逢舜禹辰又究志所之茲學豈不臻誰其起予者視  
子為席珍趨韓亦已工比孟猶欠淳慎勿驚怪竒怪竒  
世多擯吾慙遼東豕未見西狩麟汨汨塵泥間曷辨玉  
與珉昨來忽有知所索非所循使馬轉磨衡安得目不  
眴誠聞苑囿美難遣麋鹿馴自惟體衰繭寧堪事艱辛  
宜收蹭蹬迹却返江湖濱浸脰水活活漫灘石磷磷垂



釣紅鬢登舉袂白羽振以此全吾性胡能往問津非同  
子少年柯葉正蓁蓁

齊國大長公主挽詞二首

賢行聞當世尊隆異故常每令夫結友不為子求郎夜  
月初沈海姑星忽隕潢臨門親祖祭悲吹起脩岡

魯館當年盛秦臺此日遙龍歸終合劔鳳去不聞簫挽  
曲方傳薤行輒競奠椒空餘漢官屬泣送馬如潮

招隱堂寄題樂郎中

日哦招隱詩日誦歸田賦未嘗見芸人勇拋冠冕去今  
聞緱山陰身退效疏傅一旦從犢車歡言友田父復來  
釣澗邊誰問袁公路

貸米於如晦

舉家鳴鵝鴈突冷無晨炊大貧丐小貧安能不相嗤幸  
存顏氏帖況有陶公詩乞米與乞食皆是前人為

送渭州劉太保

月黑見旄頭芒角漸西向八月邊草黃胡人馬初壯無

柰我兵雄方為漢偏將嘗聞登壇人亦未免得喪得為  
凱歌還鏡鼓喧亭障千蹄使椎牛百甕令設醯喪乃軍  
之羞節制由處上進退從其呼何能求必當二事非已  
專願思古挾纊

送張推官洞赴晏相公辟

送子居大梁關中乃關外往者邊事繁秦民被災害今  
聞獨豐穰速堦無動櫓相公欲勤勞請以臨都會多選  
天下才佐佑如何賴決疑有全策何必用著蔡雖病君

強行寶刀仍喜帶豈是為俗儒空言事夸大

送張著作器宰蘄水

予聞楚山竹肉好髮亦勻隴上風雪飽石根莓苔皴搜  
林翦橫吹龍子愁水濱作邑尚簡易豈必蹈昔人願為  
季長賦安用瑤與珉

和癭盃

物以美好稱或以醜惡用美惡固無然逢時乃亦共棄  
則為所輕用則為所重道聞癭木器愛賞互歌頌定應

初得之買不論官俸  
饋面生光輝貯飲發狂縱  
坐欲置於傍行欲挈以從  
其形何險怪曾不因藝種  
凹凸本自然出縮非鬪縫  
薄才難究窮詆訶茲實恐

太廟致齋答韓舍人簡

齋舍隔牆東蕭蕭槐樹風  
聲顏雖不接翰墨遽能通  
未說涼堪飲惟愁賦少工  
此焉知素拙試與問揚雄

送張著作孟侯宰上元

天衢車馬跡急若機上梭  
義雖平生篤不越一再過  
夫

子累顧我言歸泛長河得邑美建業風流猶可歌依侑  
江令宅秋草應更多五題誰復詠鍾蔣與差我

劉原甫觀相國寺淨土楊惠之塑像吳道子畫又  
越僧鼓琴閩僧寫真予解其說

吾儕來都下將踰三十春不聞此畫塑想子得亦新茲  
寺臨大道常多車馬塵設如前日手晦昧已感人曷分  
今與古曷辨偽與真閩緇圖鳳姿越釋彈龍唇但知五  
綵爛徒謂五音淳孰識商聲高孰驚眸子神不能評譜

品索玉翻得珉二君才調高言若羽翮振將令尋常工  
千歲傳不泯

依韻和裴如晦秋懷

老葉已足蠹風振猶在柯高高低低聲切切感我多不  
念四散飛尖圓競相磨當茲思再春宛然同俟河莫驚  
衡山鴈莫問洞庭波徒聞漢武帝獨有橫汾歌

送張諷寺丞赴青州幕

朝廷久清明賢相出賢牧賢牧又選賢森森備官屬是

以邦政修良農播嘉穀上無租賦逋下有困廩蓄往者  
河朔饑奔送劇鳧鶩富公鎮青社有來咸鞠育病者調  
藥劑起者飼饘粥老稚四十萬瘦骨生壯肉鄉縣將遣  
歸田園皆可復為之置長犁為之置黃犢既完身上衣  
又付橐中粟庭下再拜辭望城皆感哭他人守一方境  
內猶不足至今趙魏間食飲常酌祝富公離山東寇盜  
頗任觸堂堂高平公德業人所伏幕府得才謀螻蟻不  
勞撲上體憂勤心掃滅得神速張侯三十餘瑩若無玷



玉八字分濃眉純漆點雙目昨日奉辟書氣貌寧近俗  
言從必石磊落事果無出縮他時為書功誰惜千毫禿

送徐秘校廬州監酒

淮南秋物盛稻熟蟹正肥況身為酒官醇酎飲不非儻  
觀衆人醉徒自使世譏與君伯氏好試以此言歸

韓子華江南安撫

韓侯出持節志在撫黔黎縣官負弩迎刺史躍馬隨千  
里宣德澤煦如春風馳寒潮不起浪怙怙威馮夷借問

何致耳試聽將所為立車呼父老勞以哀矜詞我從大明宮天子親諭之憂汝歲屢凶吏不恤汝疲已輸又索糴困橐無子遺此非陛下意恐使汝輩疑疾苦汝告我不憚為汝治父老必喜拜如餒得餉糜我稱此大是一無不宜南方二十州歡聲無幼者壺漿擁大道婦女闖短籬行聞江漢間復有宣王詩

周仲章通判潤州

昔過京口山斷崖如鞏洛抱谷黃芹泥百丈聳垠嶸山

嶺與江面地脈水可度欲鑿無淺泉孰云南土薄君為  
別乘去便比北州樂已免早濕憂仍離鴟鵂惡况逢休  
明時秋堞罷嚴柝夜愛寒江潮月臨甘露閣置酒發浩  
歌萬里波欲卻霜蟹肥可釣水鱗活堪斫縱飲不須休  
未應滄海涸終當笑揚雄窮壁常寂寞更知首陽人薇  
蕨事亦錯不若阮步兵醉鞍伸兩脚太守必吾徒儻能  
時就酌

弟著作宰南陵

新買紫騮馬欲歸清弋江去彈琴鴈獨來認鳥鳧雙橐  
實枚盈篚濃醅熟滿缸弟兄相憶否風燭舊西牕

和江隣幾有菊無酒

種菊將飲酒菊開酒無有雖不負爾目且已負爾口昨  
日三四人淡坐飢腹吼徒與哦其傍誰能置升斗當時  
陶淵明籬下望亦久幸賴白衣人不愧采盈手悠然事  
頗同必竟醉則否

五知堂

代人與  
任少傅

履道坊中白家宅五橋莊北晉公堂昔年二老曾相樂  
今日五知名獨光舉事是非都不問接花時節暫能忙  
清尊雅曲易為厭自有圖書列在傍

贈陳孝子庸

康州水邊龍母墳草樹蒙蒙起風雨五色五蛇時往來  
野鼠不穴墳上土嗟哉異類猶厚親豈彼人兮忘恃怙  
果生陳子孝且仁終日劬在民伍天清天順感其和  
嘉禾駢枝立如股遐鄉歎慕為爾隣太守欣言出吾部

中州士人傳以夸照頑爍孽良有補惟時火德君道明  
粵南祝融孝所生若然寧獨一陳生築堦表廬從此數  
和原甫同鄰幾過相國寺淨土院因觀楊惠之塑  
吳道子畫聽越僧琴閩僧寫宋賈二公真

青槐夾馳道方轡下麒麟竭來游紺宇歷玩同逡巡吳  
畫與楊塑在昔稱絕倫深殿留舊迹鮮逢真賞人一見  
如宿遇舉袂自拂塵金碧發光彩物像生精神歲月雖  
已深竒妙不愧新驚嗟豈無意振播還有因乃知至精

手安得久晦堙二僧感識別請以已藝陳或彈中散曲  
或出丞相真覽古仍獲今未枉停車輪

李端明宅花燭席上賦

百兩禮將陳王家集上賓花光濃照席燭艷暖迴春已  
接冰壺潤寧辭翠竿醇自慙持短調重對玉堂人

送李祠部知滑州

自古重名器未嘗輕授人煌煌東郡守燦燦兩朱輪父  
祖繼居此恩榮誰與隣秋風度河水馬足不生塵

送王正仲長官

汴渠沂復沁自可見遲速來時遲有糧去恨速無穀有  
糧安計程無穀不遑宿霜高萬物枯源水縮溪谷黃流  
半泥沙勢淺見感澳千里東歸船何日下清瀆澹澹風  
雨寒長汀嘯鴈鴛將投孤戍遙四顧危檣獨強語慰妻  
奴多虞賴僮僕到家秫已收綴樹橘始熟折腰無慙陶  
懷遺焉媿陸我方羨子行送望不移目

辭後木芙蓉



託根地雖卑，凌霜花亦茂。  
物稟固不遷，人情自為陋。  
幸與時菊開，誰嗟發孤秀。  
楚人搴木末，已見離騷就。

傷驥

駑驥同一輶，遲速能幾里。  
當其被問時，舉策數耳耳。  
馳騁心獨存，壓抑頭不起。  
空傳八駿名，未遇穆天子。

陳丞相燕息園

少仕既勤勞，暮節念君息。  
小車辭漢庭，緇衣賦衛國。  
廣園樹嘉木，鳴鳥來野色。  
京水魚可緡，東陂鴈可弋。  
豈不

有秦聲酒酣歌在側寧同扶風人自去北山北

依韻和普上人古琴見贈

獨繭絲為絃九竅珥為軫彈風松颼颼聽水流泯泯欣  
者舉袖舞悲者欲涕隕若此輒動人干時固能準虞舜  
今在上南薰思無盡

依韻和吳舍人見言

西垣閣老號文雄辭體能兼兩漢風絳帳舊生雖授學  
灞陵歸將已無功校文豈論居三上賦分由來本下中

不恨早朝秋雨急猶陪鴛鷺大明宮

題三教圓通堂

處中最靈智人與天地參其間有物老曷又推為三共  
以圓通出誠明自包含排楹壓文礎煥采塗朱藍而將  
置吾儒復欲籠彼聃二徒不自曉恬若均笑談越鳥不  
巢北代馬不嘶南固亦辨殊土麟鷲惟時堪

設膾示坐客

汴河西引黃河支黃流未凍鯉魚肥隨鉤出水賣都市



不惜百錢持與歸我家少婦磨寶刀破鱗奮鬚如欲飛  
蕭蕭雲葉落盤面粟粟霜菡為縷衣楚橙作麝香出屋  
賓朋競至排入扉呼兒便索沃腥酒倒腸飫腹無相譏  
逡巡餅竭上馬去意氣不說西山薇

杜挺之新得和州將出京遺予薪芻豆

魯公馬病不可出陶令言拙徒扣門舉家食粥焉用怪  
但願漉酒中常存長安侏儒勝方朔水邊漂母哀王孫  
王孫功名立四極方朔詼談干至尊我才不及三二子

摧藏自愧趨權閭前時永叔寄秉粟一秋已免憂朝昏  
今君益之薪與菽老馬病骨生精魂昨聞新拜厯陽守  
王國久客虱處禪都水借船輕復淺急趨寒汗流渾渾  
耳清眼明見野色一聽江鶴醒若噴餘糧滯鈍不暇惜  
均於朋契惟義博設如河涸膠在步縣邑亦足供雞豚  
却嗟我甑有時匱莫與太倉黃鼠論

江鄰幾邀食餽鈍學書謾成

老飢瘦腹喜食熟況乃十月霜侵膚與君共貧君餉我

吹齏不學屈大夫前時我膾斫頰鯉滿坐驚  
睨卒笑呼誠知舉筋意淺狹一餐豈計有與無

幽廟

老狐依叢祠妖橫起百怪巢臬助鳴聲穴兔資狡獪巫  
給神靈言俗奏飲食拜三年空禱祈萬疾無愈差臙臊  
日已熾疑畏誰敢懈近者勇丈夫發揭窟乃壞始時驚  
其狂今盡喜其快虓茸毛尚存獨使尾徒大廟貌更一  
新願以邪為戒

十月十八日

霜梧葉盡枝影踈井上青絲轉轆轤西廂舞娥艷如玉  
東楯貴郎才且都纏頭誰惜萬錢錦映耳自有明月珠  
一為轆轤情不已一為梧桐心不枯此心此情日相近  
卷起飛泉注玉壺

送鄞宰王殿丞

君行問鮫埼殊物可講解一寸明月腹中有小碧蟹生  
意各孺孺黔角容夬夬願言寬賦刑越俗久疲憊

金陵與張十二傅師賞心亭飲

但嗟識君遲不恨春風惡風惡舟未前置酒共談謔漁  
歌還浦頭斜日下洲角明朝渡江去相望便成昨

阻風寄刁安國

江風裂瓦鳴浦口驚浪作君駕何不来客心空寂寞

阻風秦淮令狐度支寄酒

春風不獨開春木能感浪花高似屋江船百尾泊深灣  
鐵纜千環繫長軸遠客今朝愁未平主人贈榼飲還足



前時共論酒可禁，急世救弊且勿速。我今正得盃中趣，  
効陶種秫置心曲。

江上遇雷雨

雷從燕尾來，雨到江心急。挂帆中路時，望浦前舟入。聲  
喧釜豆裂，點疾益繭立。蕩搖魚鼈腥，恐懼兒女泣。稍聞  
人好語，出顧岸已及。蘆洲有同行，言言氣吸吸。

登瓜步山二首

瓜步山頭廟堂因，魏武興亡歸從赤壁事。去憶西陵軍

井藏雲杪林根擁石稜微風認江水細甲幾千層  
山上濃雲合江南暴雨來將歸林下嶺中路遇風雷心  
速灣猶遠行遲伴屢催舟師添繫纜兒女望人迴

宛陵集卷三十八

欽定四庫全書蒼要卷一萬四千四百七十九

集部

宛陵集卷三十九

宋 梅堯臣 撰

韓子華遺冰

六月侍臣方賜冰我賦得之從友朋開盤一見水玉璞  
置坐百步無青蠅熱膚收汗起疹粟不有消渴同茂陵  
杜子每思赤脚踏韓老嘗苦如甑烝慙無二公才與學  
享此足與俗輩矜

二十二日起居退聞宣三館諸公觀瑞蓮

來朝十二旒將出未央殿微聞嘉蓮開獨許侍臣見嘉  
蓮其如何層樓擁霞片玉輦下天泉日昃不知倦恩魚  
應亦喜跳沫珠欲濺誰憐與衆歸博士臣疏賤

依韻吳冲卿秋蟲

梧桐葉未老露滴玉井牀秋蟲如里胥促織何苦忙  
苒機上絲入夜為鼠傷織婦中夕起投梭重徬徨那聞  
草根聲膏入然肝腸天子固明聖措意如陶唐下民惟

力穡不見田疇荒豈知哀斂人督責矜健強所以機中  
女心闕日月光年年租稅在聒耳信已常哀哉四海人  
無不由此戕吳侯當聽時靜坐愛初涼方將同佳人歡  
樂舉盃觴繁鳴雜蟻蟻感愴情不皇況蒙朝家恩兄弟  
登俊良意慮宜恤物以慰衆所望今者秋蟲篇不異七  
月章

陌上二女

素手寒冱羅柔纖明春萸轉盼動桂葉陽語啟瓠犀阿

姊金盛珠阿妹縑藉圭吹香襲行路豈獨下蔡迷

無悔

婦人未四十容貌已改前男年踰五十嗜慾固自偏勿  
以色敵心色衰心易遷勿以愛恃久愛移久多愆明鏡  
知惡看何須妬嬋娟

弔瑞新和尚

示化何悲戚俱焚只衲衣已隨原火盡空見野雲飛寫  
影誰方丈栽松舊翠微當年渡江鉢弟子獨將歸

依韻和吳沖卿新葺南齋

移病新秋厭直廬自將僮僕治前除已栽楚客江邊草  
不學嚴陵瀨上漁紅穗拂欄何靑絮綠叢無水亦蕭疎  
從今有月君須飲況與朋親共舍居

江鄰幾遷居

聞君遷新居應比舊居好復此假布囊家具何草草我  
貧無囊假來僮笑欲倒所笑還往人生計不足道非用  
僮僕知雖貧自懷寶

聞刁景純侍女瘡已

前時君家飲不見吹笛姬君言彼娉婷病瘡久屢治隔  
日作寒熱經時銷膏脂鑿師尤飲食冷滑滯在脾次聞  
有鬼物水火陰以施乃因道士遂實得鬼所為手灑桃  
枝湯足學夏禹馳呵叱出門牆勿復顧嘔遺今雖病且  
已皮骨尚尪羸豈暇理舊曲未能畫蛾眉當期重相見  
風月臨前墀

景純以侍兒病期與原甫月圓為飲



古龍水底鳴素秋江雲不飛江賈愁金陵舊族天祿游  
家有善笛能娛侯憶侯前年罷姑孰自買蘄州飽霜竹  
顏肥頂瘦裁青玉鑽鑿商聲五音足牛渚磯邊夜泊時  
平波不起月中吹老魚跳舞龜出泥雌蛟怨泣雄鼉悲  
新還中都人罕知交親奏酒隔簾幃丹唇一發妙響馳  
醉客欲見寧非癡昨夜劉郎辭玉卮主人勸謝當勿疑  
渠今纏瘧尚苦羸他日海蟾圓未遲圓未遲涼肝脾畏  
肝熱生腦脂生腦脂不得窺

永濟倉書事

神武立四極收兵銷衆豪輸糧來萬國積庾下千艘  
貌虎肥於豢麒麟老向槽中州無浮餓南土竭脂膏  
黃鼠羣何畏青鳩啄且蒙古梁生菌耳朽堵出螿螬  
樹腹懸虵蛻絲窠挂鳥毛塵埃雖自汨朱墨亦能操  
直宿愁風雨經年弊褐袍仲尼猶作吏我輩勿為勞

依韻和磁守王幾道屯田暑夜懷寄

地厚天青冥故交榮謝并何當一壺酒以昔相與傾  
君

今二千石未往戀山楹  
山楹夜對月孤懷  
豈忘情貴者  
幾何逝賤者  
幾何生  
夏簟且安寢  
明星上東城

依韻和孫伴鴈蕩二首

海邊巉絕有蒼山  
怪怪竒竒物象間  
百丈素流珠噴薄  
千重紅樹火回環  
遠尋僧寺石屏下  
時遇野人雲屋間  
今日京華見君說  
便思輕舸出東關

鴈蕩高高路莫通  
銜蘆秋翼入雲峯  
山頭水闊不見影  
巖下沙平時有蹤  
千仞柱天何斂閃  
萬工揮筆漫輕濃

葛巾蠟屐未能著空羨青蒼重復重

赴刁景純招作將進酒呈同會

日光如鎔金湧上滄海流一朝復一朝鑄出萬古愁大  
鑪石破碎世事安得休明月只照夜時時如屈鈞常娥  
與玉兔擣藥何所瘳大患不自治更被蝦蟆偷我思天  
地間二物最取尤措置尚如此細故曷用憂著書欲傳  
道未必如孔丘當時及後代見薄彼耽周功名信難立  
德行徒自修勞勞於我生蒂挂同贅疣不如聽隣笛就

其舉盃甌笛不煩教養酒不煩取求從今醉至春從夏  
醉至秋勿禁雞豚魚間薦鶉鴈鳩況多南方物醎腥美  
咽喉計較無以過試共阮籍謀

薛簡肅夫人挽詞四首

蕭公當貴日小吏引輕軒四德有遺美六親無異言立  
孤傳世嗣垂範在閨門澮水終歸柎秋雲逐去魂

嘗聞求子壻不似怒甘公莫以昔人比皆為當世雄家  
聲新慶續國禮舊恩隆必與齊姜墓千秋壠樹同

冠劍將朝去常知好直言戒辭猶可託先見久應存瑩  
白冰兼玉清芬蕙與蓀堂塗從此閉何日卜丘原

美合周詩播魂先岱嶽歸空堂遷舊榻素月照靈衣珠  
翠香沈匣丹青影挂幃百年親戚淚併作露霏霏

送淮南提刑孫學士

淮南木老霜欲飛順令恐縱諸侯威命書纔出邸掾謁  
已見衣繡車迎歸樂莫我聽筵莫迂清如蟾蜍夜吐暉  
不須久作平反吏自合橫經親帝闈

八月三日詠原甫庭前林檎花

秋蠹無完葉疎叢有瘁莖偶來庭樹下重看露葩榮  
衆自守常理獨開偏見情從今數霜月結子尚能成

送河陽通判張寺丞從富公辟

子諒

張公愛神鍰佩服近玉麟又拭華陰土光彩一以新  
百里無惡獸千里無冤人今朝欲何之去上延平津  
應當出匣飛騰波決秋旻

送淮南轉運李學士君錫

王都重兵廩命使總八方淮南舟車衝三楚籠利長惟  
時有才彥數計等桑羊八月賜詔行朱旆插大航汴湍  
入秋漲東鼓下鏜鏜今日發大梁明朝過睢陽睢陽授  
經地父老認道傍同業八十人或貴或為郎先生歿大  
官弟子無荷囊乃知詩書傳要在明三綱隋末聞仲淹  
來學去佐唐唐初稱名臣鮮及杜與房親見慕義人專  
門起輝光我聞房杜流已顯惟王張雲漢幾萬里星宇  
爭曜芒歸來立螭頭莫愛魚稻鄉

君錫與王伯庸張端  
明同在睢陽希文講



重送楊明叔

并序

行而有以贖者助所不足也車馬子有裘服子有貨貝  
子有所可贈者詩言爾故先為七言以送將以道彼美  
而樂乎往也子不為重邀予以規又作五言應其請

君將會稽去舊蹟可以嬉予因狀其美贈子臨路岐子  
不以為樂但願有以規噫吾豈無說畏子未及禔既求  
不語子吾曷忍子欺前年子渡淮夜泊洪澤湄有鬼稱

使者來告風波期子時再拜謝乃被隣船嗤遂巡鬼復  
至復附船家兒怒彼慢嗤士明當使驚危船兒傍舷迴  
走若一足夔翌日各解舟出浦風動旗子獨乘安流彼  
受橫浪吹此事非子傳焉得他人知昨逢令弟蘊備述  
果不疑越俗素重鬼慎勿啟其私子口有仁義子腹有  
書詩子嘗談王道怪語固未宜近聞蘇才翁問子辟者  
誰得非外戚侯子怒已豎眉今我倘得罪甘與蘇同之

送董傳秀才之汝陰

社燕已歸盡秋鷺猶繞林久為梁國客不起灞陵心徒  
步赴朋館遠遊無索金江君丈人意莫入楚鄉深

鄰樂  
常止

行此

### 送張子野屯田知渝州

舊居若溪上久客咸陽東歸來得虎符馳馬向巴中歌  
將聽巴人舞欲教渝童況嘗善秦聲樂彼渝人風忠州  
白使君竹枝詞頗工行當繼其美貢葛勿忽忽

### 送楊子充愈知資陽縣

家近古臨邛聞多木蘭樹其人襲芳馨乃有相如賦成名三十年始見列鴛鴦出為資陽長秋鬢已點素天子愛黔黎歸與蜀民諭當時同洛陽過半作丘墓屈指今所存無如君最故惟酒可餞行不飲車空駐

送司馬學士君實通判鄆州

君家世典史君復續祖為蘭臺未成書汶陽從已知將行我何贈一誦溪堂詩聞彼多蒲魚可助鼎與卮在昔阮嗣宗初赴東平時醉扶乘蹇驢圖書猶可披今見國

門外徒馭不驅馳十里馬一歇五里車一脂不得同鴈  
羣相送過寒陂

送陳殿丞知韶州

從益

韶州使君行請問韶石名傳聞古帝舜石上奏九成鳳  
皇為之下朱鳥不復鳴舊祠亡玉琯四序安得平至今  
南方熱臘月裘服輕事外共廢酒曲江風物清

寄岳州孫屯田

琳

從來洞庭好都在岳陽樓明月千里寒光三萬秋年

華有時盡風物不知休太守憐予句應如沈隱侯

大愚

大愚不量能品藻輒已出朝以軻為同暮以孔為匹其人豈鷹雀鳩蛤化五日指鹿危二世師歆造新室雖云詐力尚終自殞斧鑕

宛陵集卷三十九

欽定四庫全書蒼齋要卷一萬四千四百八十

集部

宛陵集卷四十

宋 梅堯臣 撰

寧陵阻風雨寄都下親舊

晝夜風不止寒樹豪未休人言雨殺風雨急風未柔獨  
扶慈母喪淚與河水流河水有冬竭淚泉長在眸予生  
五十二再解官居憂昨者母疾亟骨肉相聚愁橐中無  
一錢緩急何可求母當臨終時囑我貧莫羞隨宜具棺

歿厚貸壓人頭死事定無益生償且無由泣涕聽母言

心腸如刺鉤小子雖不令長養恩曷酬旦夕期速平後

事勿預謀願母強藥食更延百千秋固云莫望我我魂

已飛遊語畢忽奄逝撫膺呼裂喉未能一物備迷亂將

安投艱窘見風義乃有令朋儔致賻或錢帛最力李與

劉廷老禁省及石渠奠助日不周裴楊乞銘蓋文篆古

復道如晦潭饒兩大艦朝索暮泛浮哀憐荷君子才德

慙未修三日違大梁兩宿此遲留聊書同些挽試託楚



人謳

新霜感

前日衣上露今日衣上霜我母魂何之膏火糜我腸隔  
棺三寸地如在萬里鄉嗙呼不聞聲飲食空置傍昔時  
憂我寒縫衣紉線長線長必絮厚要與風霜當又每恐  
我飢羨臍自調嘗此身內外間莫得頃刻忘舉衣不忍  
着舉筋不下吭一念百感生欲問天蒼蒼

過淮

侍親數數來浮汴護櫬迢迢復渡淮肯蓄曾無御寒具  
細君惟有隱居釵月痕遠入魚銜浪潮退長汀蚌閣崖  
素服華顛色相似青銅不忍見形骸

淮陰

天下滔滔久厭秦英雄蛇鼠竄荆榛少年豪橫知多少  
不及沙頭一婦人

杪羅樹

李邕  
有碑

杪羅古樹常占歲在昔曾看北海碑今日四方俱大稔

不知榮悴向何枝

就野人買兔

霜濃草白兔初肥  
蒼鶻調拳獵犬攜  
刺付錢刀買庖餽  
不須緣徑更求蹄

使風船

清淮直上水連天  
坐看高帆後復前  
自是乘風有遲速  
不由人力愛爭先

淮陰侯廟

韓信未遇時，忍飢坐垂釣。歸來淮陰市，又復逢惡少。使  
之出胯下，一市皆大笑。龍蛇忽雲騰，蛭蟻豈能料。亡命  
乃為將，出奇還破趙。用兵不患多，所向孰敢標。功名塞  
天地，翦刈等蒿藿。于今千百年，水上見孤廟。鷺銜葭下  
魚相呼，尚鳴叫。高皇四海平，有酒不共酌。古來稱英雄  
去，就可以照。

又平律一首

漢家天下將，廟古像公主。百戰自亡楚，一時空王齊。鄉

人奏簫鼓舟子賽豚雞不改寒潮水朝平暮復低

入滿浦

馬頭攬岸斗鷺尾泊船齊風送寒潮急雲藏晚日低逢  
人多楚語問客者吳雞難覓枚臯宅蒼葭處處迷

許發運待制見過夜話

許公運國儲歲入六百萬上莫究所來下莫有剝怨十  
年無纖乏功利潛亦建昨除侍從官聊為磨世鈍比於  
以舌得此豈愧物論較量多少間未足數劉晏大計苟

寔費曷不使預算欲倍即能倍但勿惑謗訕擾民可以  
奪食官可以竄要付與權衡一切出果斷嗚呼任智力  
長短固有限制財猶制兵太甚則生亂公譬淮陰侯多  
多自益辨我今聽其談夜去為扼腕書之俟采詩咨訪  
不可緩

登泰山日觀峯 并序

予泊瓜步山下夢王景彛問韋應物日觀峯詩予即誦  
知語不屬謂景彛曰當為檢韋集覺而亟閱韋集無此

題尚記夢中所誦首句云晨登日觀峯遂續補之

晨登日觀峯海水黃金鎔浴出車輪光隨天行無蹤正  
視刺我目攢集如劔鋒照耀萬物興磨滅萬物凶草木  
既無命必聞石間松當時一避雨安得大夫封人而苟  
不遇抱簡誦六龍

重過瓜步山

魏武敗亡歸孤軍處山頂雖憐江上浦鑿巖山巔井豈  
是欲勞兵防患在萌穎我昔常登臨徘徊愛晴景片雨

西北來風雷變俄頃疾行下危磴屨脫不及整濡濡入  
舟中幼子喜抱頸問我適何之衣濕不太冷昨暮泊其  
陽月黑夜正永鴈從沙際鳴旅枕自耿耿平明夾櫓去  
廟樹聳寒嶺舉首生白雲飄搖水中影

發長蘆江口

篙師施工相整衣龍女廟中來宰豨野祝擊鼓降神語  
老鴉銜肉上樹飛長江無風平似削兩櫓夾舸行將歸  
南國山川都不改傷心慈姥舊時磯



龍女祠祈順風

龍母龍相依風雲隨所變舟人請予往出廟旗脚轉旗  
指西南歸飛帆疾流電長蘆江口發平明白鷺洲前已  
朝膳竹根盃玦不欺人世間然諾空當面

西施

濺濺溪流散冉冉石髮開一朝辭浣紗去上姑蘇臺歌  
舞學未穩越兵俄已來門上子胥目吳人豈不哀層宮  
有麋鹿朱顏為土灰水邊同時伴貧賤猶摘梅食梅莫

金  
夕  
日  
八  
十  
二  
厭酸禍福不我猜

金陵三首

恃險不能久六朝今已亡  
山形象龍虎宮地牧牛羊  
江上鷗無數城中草自長  
臨流邀月飲莫挂一毫芒

金陵逢曉雪撩亂逗雲來  
已失烏衣巷還成白玉臺  
山盤猶隱見江轉似昭回  
一聽高樓笛依稀認落梅

每入秦淮口風波更不憂  
重看後庭樹還起舊時愁  
故老都無有遺蹤莫可求  
何人能識意白鷺在寒洲

了頭石

此碑也在金陵斷石岡上有吳大帝字焉

了頭石雖斷文字未全訛年筭赤烏近書疑黃象多幾  
時經霹靂異代見干戈更與千秋看松煤定費摩

漫書

蒲葵兩錢扇漫寫未嫌輕老媪持將去無端色不平

閔冢

吳天冊中

盜發廣陵冢及扉開石樞中環走徹道高闊可通車五  
尺銅鑄人執兵冠服朱壁石刻位號列侍幽宮隅殿將

將軍屬侍郎常侍俱啟棺見其尸鬢斑顏未渝白璧十  
雙藉雲母一尺鋪黃金塞耳鼻千歲不腐枯生為貴與  
富死與人未殊後世逢暴禍雖久將焉如堯舜及周孔  
豈不固形軀

雪中發江寧浦至采石

泊舟斫枯葭歎火爇岸傍冒嶺雲冥濛漫江雪飛揚拖  
冰脩網澀出水朱鬢殭曠然起遠懷風旗轉危檣千帆  
共辭浦攬錯逆水翔落星始前瞻瞬目已後相鯨魚何

時來楊花吹茫茫沙草不可辨  
鴈立知汀長山頭化石  
婦忽變素質光豈復願聞笛  
莫逢桓野王

登采石山上廣濟寺

船從山下過直上見僧軒  
繫纜登磯石緣崖到寺門  
短籬遮竹養危路踏松根  
却看滄江底帆歸烟外昏

效阮步兵一日復一日二首

一日復一日一朝復一昏  
來新去成故俯仰變涼溫  
有貴即有賤未若賤常存  
驛牛慕孤狔黃犬悲東門  
禍福

相為基損益不復言吾祖入吳市應龍非伏轅

一日復一日一晨復一夕四序相盛衰三辰運光魄下  
上有常理憂患何時易先爛泣金燃先焚歎薪積但願  
遠世網焚爛不能責麒麟出非時未免西狩獲鷗鳥浮  
洪波心已預海客

阻風宿大信口

東梁如印蠶西梁如游魚二山夾大江早暮潮吸噓解  
舟辭姑孰速欲還吾廬風逆未可前泊浦近烟墟波中

事網罟乘月多夜拏冰灘聚鳴鴈霜葭正疎疎是時昂  
畢中曠渺天地虛靜坐人已眠我慮久洗如自起取美  
酒獨酌邀蟾蜍蟾蜍射白光入盞亦躊躇醉來不解舞  
欲攬嫦娥去昔對謫仙人此意復在予既醒裂尺素立  
作數行書寄與青山家精靈其有諸

早發大信口

犬吠知船解村墟尚閉門霜泥粘纜尾冰水閣潮痕撇  
撇鷓鴣去纖纖舴舻昏梅湖到不遠寄信向田園

黃池月下共酌得池字

將歸謝公郡喜見阮家兒  
但對月如水那能酒似池  
衰形疑鏡照葆鬢怯霜吹  
宿鴈不堪託鄉人知未知

泊昭亭山下得亭字

雲中峯午午潭上樹亭亭  
久作大梁客貧留小阮醒  
灘愁江舸澀祠信楚巫靈  
日暮渡頭立山歌不可聽

送鹽官劉少府古賢

我祖南昌尉時危棄去僊  
劉郎從宦日天子治平年  
燥



茗山中火熬波海上烟吳民不為盜惟此撓君權

大師杜相公篇章真草過人遠甚而特獎後進流  
于詠言輒依韻和

杜詩嘗說少陵豪祖德兼誇翰墨高蘇李為奴令侍席

鍾王北面使持毫

子美祖審言嘗自謂我詩可使蘇李為奴我書可使鍾王北面

郊麟

作瑞惟逢趾天馬能行不辨毛一誦東山零雨句無心

更學楚離騷

依韻和僉判都官昭亭謝雨迴廣教見懷

賽雨何從事高情苦愛山謝公聯句後

謝公有昭亭賽雨與何從事聯

句惠遠過溪間笑處巖相答歸時酒在顏端憂守窮巷無力共躋攀

依韻和吳正仲屯田重臺梅花詩

桃花已滿秦人洞杏樹猶存董奉祠莫怪寒梅獨多葉只緣樂府有新詩

讀吳正仲重臺梅花詩

此樹在靈濟王廟

楚梅何多葉縹蒂攢瓊瑰常惜歲景盡每先春風開龍

沙雪為友青女霜作媒  
託根邇廟堂結子助鼎鼐  
吳侯本吳人筆力高  
崔嵬但詠同姓木予非梁棟材

依韻和正仲重臺梅花

芳梅何萋萋素葉吐層層  
近臘寒猶勁先春氣已承  
冷香傳去遠靜艷密還增  
有意常欺雪無功合鏤冰  
早烟籠玉暖凍雨浴脂疑  
漢女新粧薄燕姬瘦骨稜  
壓枝惟恐折簇萼似難勝  
神物終來護江鄉未解矜  
獨竒心豈欲寄遠客何曾  
不見黃鸝度寧防粉蝶凌  
月光臨更好

溪水照偏能畫軸開雲霧宮刀翦綵繒都無筆可銜莫  
信巧堪憑丹杏塵多雜天桃俗所稱故林嘗渴望大庾  
更愁登重和陽春曲聲辭猥媿仍

正仲見贈依韻和答

平生好書詩一意在抱槩既無抉雲劍身世遭黥黥恥  
游公相門甘自守恬淡妻孥每寒飢內愧劇劇慙時賴  
二三友乞米慰窮慘雖然情懷惡亦未廢誦覽如負會  
稽辱欲雪效嘗膽作文持與人百不得一頷聖猶嗜好

殊獨取菖蒲歎我愚希六義將使鬼神感譬彼捕長鯨  
區區只持晉青天挂虹霓踴跂不可擘太華五千仞妄  
學巨靈撼幸且同蛙黽近樂在井坎蒼髮況種種存非  
衛髦鬣吳侯琅玕姿而來視亂莢鳳皇五色毛曷羨未  
翅蝻染夏有正米安用此淺黥乃知叔度陂萬頃見澄  
澹孟軻患為師薄劣亦何敢

正仲往靈濟廟觀重臺梅

玉盤疊捧溪女歸魚鱗作室待水排竹間山鬼入夜啼

古廟久閉誰啟扉  
屈原憔悴江之沂  
芙蓉木蘭託興微  
賈誼未召絳灌擠  
香草嘉禾徒菲菲  
曾無半辭助訶譏  
國風幸賴相因依

依韻和昭亭山廣教院文鑑大士喜予往還

山暖春烟重林昏古寺藏  
溪流過曉漲嶺樹見新行  
馬去侵雲蹟風來襲野芳  
禪衣頻斗蠟屐莫趨蹌  
飛鼠時過擲饑禽或下頰  
憑欄何所適望堞正相當  
捧膳溪童繫銜花鹿女香  
登臨無險絕不似畏巖牆

依韻答達觀禪師穎公

霜露每懷感江山空復情  
老便林室靜坐默巷童聲盡  
日都無語逢人亦強迎  
浮生過半百安用此虛名

題姑蘇邵氏園居

積水夫差國閒居魯叟心  
石科雲起潤城角竹連陰  
燕入池塘晚花開島嶼深  
應當效疏傳不惜橐中金

嘗正仲所遺撥醅

屈原自著漁父篇  
舖糟不及漁父賢  
世無功名多浪死

劉伶阮籍于今傳邇來獨酌邀明月惟有青山李謫仙  
謫仙歿後幾百年市樓日沽千萬錢沈湎豈少當道眠  
文字不見空月圓吳均之孫何我憐雙壺貯醅持置前  
豈乏阮李詩與瘡淺飲強對春風妍

依韻和正仲寄酒因戲之

上字黃封誰可識偷傳王氏法應真清淮始變醅猶薄  
句水新來味更醇欲擬比酥酥少色曾持勸客客何人  
紅梅雖是吾家物老去無心一醉春

清淮酒本王九  
傳法於山陽



春雨

春雨霽霽鳴百舌  
林花淡淡洗燕脂  
眼前耳底催人殺  
不醉三盃大是癡

春夜聞雨

風味正不寢驟來寒氣增  
簷斜滴野蘗窓缺搖春燈  
孺子睡中語歸人行未能  
前溪波暗長定已沒灘稜

早春田行

風雪雙羊路梅花溪上村  
鳥呼知木暖雲濕覺山昏  
婦

子來陂下囊壺置樹根予非陶靖節老去愛田園

宛陵集卷四十

欽定四庫全書薈要卷一萬四千四百八十一

集部

宛陵集卷四十一

宋 梅堯臣 撰

依韻和馬都官春日憶西湖寄陸生

時望前湖倚玉梯，雲山橫絕路東西。  
只知遠目窮芳草，不見高人在曲堤。  
畫楫尋春應醉去，舊朋懷昔欲魂迷。  
海邊燕子來無數，願託雙飛寄短題。

送志來上人往姑蘇謁元曹

折取東橋柳青青向故人欲知問館處要識舊溪春旋  
灑銅餅水休霑野寺塵吳門逢隱者必是漢名臣

溫成皇后挽詞

輦洛園陵啟函關鹵部聞素車迎紫氣靈襪度青雲歌  
欲傳長恨人將問少君明年賀元日無復繡衣薰

和真人萬松亭虎窺泉

南岡新路平東嶺新亭成嶺上松萬株嶺下泉一泓松  
未龍鱗老泉曾虎跡行虎去豈不渴松今豈不生泉無

百尺繩安見甘與清松無百歲人安見千丈榮道人能  
喻道莫使世人驚我來開醉眼不似阮步兵

種碧映山紅於新墳

年年杜鵑啼口滴枝上赤今同萇弘血三歲化為碧因  
移新塚旁顏色照松柏

邵郎中姑蘇園亭

吟愛樂天池上篇買池十畝皆種蓮薄城萬竿竹嬋娟  
藤纜繫橋青板船折腰大菱不直錢鷓鴣鷓鷯沙際眠

水從太湖根底穿，月出洞庭山上圓。  
公歸與客相留連，秋風鶴唳春杜鵑。  
斑鱸斫膾紅縷鮮，紫豉煮莼香味全。  
我思白傅在三川，吳船雖有吳饌偏。  
當時九老各華顛，裴令來過吟復聯。  
至今怪石存舊鐫，七葉樹蔭黃金田。  
羨公有子勝昔賢，高門通車千萬年。

與正仲屯田遊廣教寺

春灘尚可涉，不惜濺衣裾。  
古寺入深樹，野泉鳴暗渠。  
酒杯茗具，山巖間盤蔬。  
落日還城郭，人方帶月鋤。

哭謝公儀學士

道路傳聞日驚嗟尚復疑疾因勤學得命不與人期賈  
誼年傷少相如恨見遲向來公輔器看取李家知

依韻和王介甫兄弟舟次蕪江懷寄吳正仲

楚客連檣泊晚風吳人江畔醉無窮少陵失意詩偏老  
子厚因遷筆更雄貫口信潮千里至平沙落日一時紅  
知君兄弟才名大我愧白頭遼水東

依韻和吳季野馬上口占

溪頭三月草菲菲城畔春遊惜醉稀  
莫信杜鵑花上鳥人歸猶道不如歸

邵考功遺鱖魚及鱖醬

已見楊花撲撲飛鱖魚江上正鮮肥  
早知甘美勝羊酪錯把莼羹定是非

昨於發運馬御史求海味馬已歸闕  
吳正仲忽分餉黃魚鱖醬鮓子因成短韻

前欲淮南求海味緘書未發報還臺  
陸機黃耳何時至



聖品分傳事按杯

正仲荅云鱉醬乃是毛魚耳走筆戲之

折却毛魚一品資吳郎聲屈向吾詩若論鱉子無從著

冤氣衝喉未可知

正仲詩云鱉黃鱉子出蘇臺蘇臺非出鱉也

春日東齋

剝剥禽敲竹薰薰日照花耳中無俗聽眼底有閒誇逃  
笋過幽草吹香到別家吾懷方自得切莫問生涯

吳正仲遺新茶

十片建溪春乾雲碾作塵天王初受貢楚客已烹新漏  
泄關山吏悲哀草土臣捧之何敢啜聊跪北堂親

閒居

讀易忘飢倦東窗盡日開庭花昏自斂野蝶書還來謾  
數過籬笋遙窺隔葉梅惟愁車馬入門外起塵埃

依韻和季野見招

悲憂如路去無程靖節終朝酒自傾苦苦來招為醉伴  
西山不使伯夷清

依韻馬都官宿縣齋

常愛陶潛遠世緣  
阮家仍有竹嬾娟  
夜深風撼蕭蕭響  
誰憶北窗人正眠

吳正仲見訪回日暮必未晚膳因以解嘲

永日無車馬間坊有竹鄰  
雨中烏帽至門外綠苔新  
不殺雞為具堪題鳳  
向人山公識墨在知我舊來貧

昭亭潭上別弟

從來潭上別先賽  
故山祠却入舟中飲  
無令盞盡遲須

拚一日醉便作數年期落日馬嘶急岸傍人散時

夢後得宋中道書

四月十九日

宵夢宋子語晝得宋子書書意與夢語曾不異往初昔  
我遭家難逢子亦在廬我南君大梁千里非隔疎念處  
天地中天地猶一車日月為兩轂星辰隨徐徐晝夜轉  
不已載之將焉如冉冉趨死鄉萬古曾無餘其間乃有  
夢覺實夢何虛何虛亦何實及盡皆同墟身世既若此  
合離休歎諸

送吳季野太博移蜀

葦箔蟬齊老桑林葉更生楚禽多異響蜀棧未堪行客  
散岸傍席馬還溪上城過都當有問為語欲畧耕

至和元年四月二十日夜夢蔡紫微君謨同在閣  
下食櫻桃蔡云與君及此再食矣夢中感而有賦  
覺而錄之

朱櫻再食雙盤日紫禁重頒四月時  
混朗天開雲霧閣  
依稀身在鳳皇池  
味兼羊酪何由敵  
鼓下莼羹不足宜

原廟薦來應已久黃鶯猶在最深枝

依韻和吳正仲赤目見寄

尋常不病眼青白看人多暫見朱成碧難逢扁與和金

篋舊說在訶子古方磨我自苦風痺思君那得過

葛洪治赤

目翳膜方訶子一枚以蜜調口磨注目中

雨鷺

五月五日

雨鷺去還來銜蟲為雛食雄雌濕已倦梁棟冷並息綠  
礎蚍蜉群拾餒蜻蜒翼穀粟滿京園任從黃雀得

夏蟲

物久必自化化之猶騫騰當看廁中蛆去作盤上蠅飛  
聲既混雞斂迹何疑冰寄言漆園吏已知鷓與鵬

秋雨篇

秋雨一向不解休連昏接晨終窮秋梅生不量仰天問  
神官夜夢言語周日月是天之兩目忽然生翳無藥瘳  
只知淚滴為赤子赤子豈悞天公憂天公哭霽霽灑涕  
落九州地祇不敢安泥潦已沒頭乃因從容告神官后

稷今在帝所不從前后稷知稼穡曾以筋力親田疇曷  
不告帝且輟泣九穀正熟容其收蚤時不泣此時泣憂  
民欲活反扼喉神官發怒髭奮虬下士小臣安預謀恐  
然驚覺汗交流樹上已聽呼鷓鴣

中秋月下懷永叔

有朋無明月秉燭光強去聲致有月無樂朋獨酌顏易醉  
往年過廣陵公欣來我值期玩秋蟾圓靜掃庭下地復  
邀高陽公賸作詩准備特特乃多連後池風雨至一夜



看石屏恒唵無逸氣今宵皓如晝千里嗟離異固知理

難并把酒遙相寄

當時出月  
石屏同詠

聞永叔出守同州寄之

冕旒高拱元元上左右無非唯唯臣獨以至公持國法  
豈將孤直犯龍鱗茱萸欲把人留楚首肯方枯馬入秦  
訪古尋碑可銷日秋風原上足麒麟

九日陪京東馬殿院會疊嶂樓

誰言天去遠山上有樓臺峯色引溪色共入茱萸杯行

當登泰山雲掃日月開柏烏與城烏兩處休鳴哀

酒病自責呈馬施二公

李白死宣城杜甫死耒陽二子以酒敗千古留文章我  
無文章留何可事杯觴況承先子戒宜不著口嘗昔聞  
有田實以此相減亡禮飲不在多歡飲不在荒二公方  
逢時安得入醉鄉

宣城馬御史酒闌一夕而西因以寄之御史嘗留

老馬與予僕

三更醉下陵陽峯，平明溪上去無蹤。  
叉牙鐵鎖謾橫絕，濕槽不驚潭底龍。  
斷腸吳姬指如笋，欲剝玉闕將何從。  
短翎水鴨飛不遠，那經細雨山重重。  
却顧舊埒老病馬，塵沙歷盡空龍鍾。

詠懷

西方有鳥鼠，生死同穴居。  
物理固不測，孰言飛走殊。  
雄雌豈相匹，飲啄豈相須。  
一為枝上鳴，一為莽下趨。  
苟合而異嚮，世道當何如。

荅仲雅上人遺草書并詩

經月不出戶堂上多綠苔忽有方外客衣披稻畦來來  
從青山下手把紈素裁筆草數行字瘦虵起春雷渴墨  
未散霧屈角麟欲開裝為兩大軸置我并瓊瑰懶瞋長  
鬚奴挂壁不掃埃智永與懷素其名久崔嵬師今繼此  
學入神在徘徊未料輒以我便比和羹梅我心常苦酸  
得姓何可能

讀吳季野芝草篇

阮生存詠懷美彼曜朱堂一榮不復枯五色異衆芳衆  
芳發朝露俄以斂夕陽丹堊起瓦礫又匪媚棟梁此稟  
由至和君子要有常

送吳季野

贈言必有規無規固無言強言固無補何異秋蟲喧君  
行蜀道難不厭治輕軒母歿未歸土女長未出門誰能  
力為此勞苦游牆藩

吳季野話撫州潛心閣

高閣潛心所圖書曝蠹收青山隨宅轉遠水向門流迤  
邐看無厭潺湲聽不休一聞秦洞說便欲泛漁舟

詠懷四首

一身頭面間所用皆有長兩耳主於聽兩目主於光維  
鼻主於嗅維舌主於嘗以耳辨黑白以目分宮商以鼻  
識酸醎以舌聞嗅香各各及爾用安得無悲傷此能而  
兼彼自勞由不量寄言世上人欣欣蹈其常

東方有野父穰田一豚蹄復操一盃酒祝穀滿吾棲百

金請救兵所欲奢所齎彼何滑稽生仰天獨笑齎

自余居田里未免病與貧常把神農書每以藥物親處  
方猶持法義比君使臣但恨無餘資豈及療我鄰筆頭  
不中書聊可備急人昨日除吏來吾邦為長民欲溺復  
然灰敗筆前已陳

風驅暴雨來雷聲出雲背若決千仞溪追奔下天鎧堂  
堂亞夫軍吳楚不足碎旱氣沃原田煩蒸洗闌闌深料  
生注射聚沫猶壅礙青葱草樹鮮斷歿虹霓在向晚留

霽暉芙蓉染新黛

送毛祕校宣城主簿被薦入補令

良驥不必大騰羈已超邁良方不待寒調弦自勁快宣  
城古大邑聽訟易龍耳贖君能抉其塞牢與民共賴自當  
割雞用刃必無鈍敗嘗聞開元時令長多賜戒戒石今  
尚存世異事不背以此贈行行無酒勿我怪

鴨脚子

魏帝迷遠圖於吳求鬪鴨乃為吳人料重玩志已慳江



南有嘉樹脩聳入天插葉如欄邊跡子剝杏中甲持之  
奉漢宮百果不相壓非甘復非酸淡苦衆所狎千里競  
齋貢何異貴爭噫

宛陵集卷四十一

謹案卷四十第二頁後二行月痕遠入魚銜浪刊  
本痕訛銜據宋詩鈔改

卷四十一第七頁前八行乃因從客告神官據宋  
元詩會告作語





總校官庶吉士臣張能照

校對官庶吉士臣戴心亨

謄錄舉人臣孫漢

欽定四庫全書蒼會要

集部

宛陵集卷四十五

二五

詳校官助教臣常循



欽定四庫全書會要卷一萬四千四百八十二

集部

宛陵集卷四十二

宋 梅堯臣 撰

八月十五日夜東軒

隔竹已見月清光度谿來移影上素壁與我相徘徊是  
夜正中秋天地霧露開人疑玉兔出藥杵不生埃嫦娥  
倚冰輪艷色若自媒它夕豈不好物意為之摧

送楊辯青州司理

儒者服褒衣氣志輕王公一落該網中折節長俯躬山  
東多豪士片言不可窮青土饒嘉棗無以人鈍蒙彼知  
南楚輕強始必弱終矯志合其情乃是吾徒通行當問  
友生為我舉杯空

隱靜山訪懷賢上人不遇

松上垂青蔓蒲根瀉碧泉高僧來不見却返五峯前

遊隱靜山

心在名山久積歲未及遊將過值風雨路不通馬牛丁



壯四五人籃輦時夏休轉谷逢烟火下隰多田疇偃穉  
黃壓畝刈麻束盈丘始覺山門深長松如騰虬直上百  
餘尺蒼髯葉脩脩五峯迎人來冷逼臺殿秋石泉出雲  
中引入舍下流緣源至崑口崑底魚可鉤天昏碧溪去  
果熟青猿偷草樹不盡識自起詩人羞濺濺澗水淺苒  
苒菖蒲稠菖蒲花已晚菖蒲茸尚柔靈根采九節試共  
野僧求逡巡能致之衰疾無甚憂昔聞有釋子渡江用  
杯浮棲心向茲地理骨在林陬駁陰漏斜光徒欲窮巔

幽夜還南陵郭幾落猛虎喉

路詠

五里十里銷磨盡千蹄萬蹄來往蹤古今不是不經歷  
踏破青山重復重

書席語送馬御史

天意漫漫物自供聞香能至是喧蜂野人割蜜不須盡  
留與寒脾作御冬

送李南玉

小人貧於資君子貧於時小人富於貨君子富於辭貧  
雖同寒飢富不同路岐彼富歿則已此富名不移丈夫  
事百變未死安可期明明趨財利莫卹前人嗤舉家如  
春蠶仰食不可遲況念宿債窘何愧賤士為買臣嘗負  
新相如猶滌卮君思此二人信吾所不欺邇者有趙壹  
窮憤自興詩乘驥抱美玉樂與和未知友來鮮逢遇後  
世無苦悲

代書寄鴨脚子於都下親友

予指老無力不能苦多書書苟過百字便覺筋攣拘京  
都多豪英往往處石渠作書未可周寄聲亦已踈後園  
有嘉果遠贈當鯉魚中雖聞尺素加餐意何如

秋日家居

移榻愛晴暉翛然世慮微  
懸蟲低復上鬪雀墮還飛  
相趁入寒竹自收當晚闌  
無人知靜景苔色照人衣

昭亭別施度支

昭亭送客地來往四十年  
常視松端日每稽潭上烟  
風

移虎旗脚寒入牛童肩待訪名山去相期廬阜前

潘歙州話廬山

潘侯話廬山落落尤可伏初云江上來遠見雲中瀑捨  
舟到雲外觀瀑已崑麓徃徃逢平田攢攢愛深木竹門  
懸徑微涼水陰藤覆坐石浸兩骸炎膚起芒粟夕陽穿  
萬峯高下相出縮尋常香不分但被烟嵐畜絕頂水底  
花開謝向淵腹風力豈能加日氣豈能暝攬之不可得  
滴瀝空在掬夜昏投僧寺孤燈望溪曲忽聞清磬音漸

近幽林屋止侯休多談已滿我心目懷游二十年夢寐  
今固熟何當借輕舸一往如飛鷲

秋日村行

谿霧晝又收山村夜初晦饑禽來往飛遠樹青紅碎原  
上楚牛童屋頭吳婦碓雞肥酒已熟野老邀同輩

吳正仲遺蛤蜊

紫綠常為海錯珍吳鄉傳入楚鄉新樽前已奪蟹螯味  
當日莼羹枉對人

送潘歙州

潘過宣城而送之

一見新安守便若新安江  
洞澈物不隔演漾心所降  
遠指治所山已入隣齋  
窗捧輿登南嶺策馬懷舊邦  
養親將為壽傾甘抱玉缸  
觀軍將勞士嚮肥堆羊腔  
下車談詩書上世擁旄幢  
勿窺淵游鱗無吠夜驚  
獠他日聞課第天下誰能雙

馬都官行之惠黃柑荔枝醋壺

梁霜胡甘熟烘日荔枝美橘柚未為精  
葡萄安可擬郭

生始能贊魏文何謬比二果皆世珍乃遺及賤士而復

副醇醖或乞自諸已豈惟享遠味終得為直矣

郭璞贊云厥包

橘柚精者惟甘魏文帝記云南方龍眼荔枝寧比西國葡萄石蜜

前以柑子詩酬行之既食乃綠橘也頃年襄陽人

遺柑予辨是綠橘今反自笑之

昔辨荊州悞今為越叟迷黃柑與綠橘正似珉珠圭

新安潘侯將行約游山門寺予以潭淖遂止因為

詩以見懷



蒼山自為門呀豁異鐫鏡路通石壁盡潦起田穉陷傍  
嶺有結廬潛潭淨於鑑聞之固欲往久雨濕泥濫莫陪  
太守車然諾豈誑賺遙遙橋上去望望馬猶站畏滑不  
肯行非關惜韉轡

依韻自和送詩寄潘歙州

潘侯擅詩筆五色神授江世家有大勳佐舜同厖降子  
孫逢太平少小事書窗源流本慷慨吐論皆經邦量猶  
函牛鼎吾徒媿嬰缸開口必典實省腹惟空腔作者過

我門應笑無戰幢窮老在弊廬何異守戶狽有心希買  
交白壁無一雙

避為師依韻荅李獻甫

蛟龍養鬚鬣當在浩浩潯虎豹養文采當在巍巍岑我  
無太山高我無滄海深斗水與堆阜恐未慰此心

送李逢源

襴衡負其才沈沒鸚鵡洲李白負其才飄落滄江頭後  
亦多效此才薄空羈囚文章本濟時反不能自周吾嘗

戒吾曹慎勿異爾流  
臧倉毀孟軻桓魋迫聖丘  
雖云推之天未免皇皇求吾今  
重子學無力薦公侯行當思吾  
言非教子佞柔

重送李逢源歸蘇州

吳客歸從楚霜華著馬蹄  
倦童持敝橐呼艇過寒溪  
寂寞冥區中飯依佈日午雞  
張儀猶舌在不必愧於妻

黃國博遺銀魚乾二百枚

乾若會稽笋色比荊州  
銀熟宜煨栗火飲助擁爐人低

陰欲飛雪酒微生  
頰熱海上使方來  
多饗不為餐

三和寄潘歙州

昔固聞陸海今復有潘江  
文章吞時英光芒瞻星降

爾雅

曰降婁  
奎婁也

如游太室陽仰見玉女窗  
高才生大國試政來

遠邦道傍一相顧  
冰壺臨瓦缸逸驥美豐肉  
老癯慙瘦腔藻詠荅下  
俚玉鈴鏘寶幢尋言不悟言  
自笑趨塊猶終知將門豪  
射鵬常貴雙

送天台李令庭芝

吾聞天台久未見天台狀去海知幾里去天知幾丈峯  
嶺隱與出崑壑背與向雲雷反在下泉瀑反在上幽深  
無窮窺杪眇無窮望至險可悸慄至怪可駭喪石橋彎  
長弓跨絕絃未放當時白道猷平步入青嶂去為六百  
石亦見志所尚子欲廣異聞可以一尋訪

十一月十二日賽昭亭神

冷雨凝雪未成雪潭空魚寒歸石穴長蒿扣穴倩鯉魚  
寄信山頭來奠設魚傳水鳥飛上山山大槎槎乾吹咽

旋灰起角巫鼓鳴漆俎銅盤顛牲血琵琶嘈嘈神降言  
福汝佑汝無災孽西向啐飲東向迴溪心却望山崔嵬  
依韻和吳正仲冬至

流光冉冉即衰遲物趣迴還似轉規長景已知今日至  
孤懷不比少年時偶陪上閣鴛鸞後且與南州父老期  
況有春禾新酒熟百分休放手中卮

施君挽歌

哀鐸悽悽裏銘旌杳杳中澗雲銷總帳山雨入蒿宮世

路行來久泉途去莫窮素吟應共葬飲韻在松風

杜和州寄新醅吳正仲云家有海鮮約予攜往就  
酌逡巡又云幕中有會且罷此飲

淮南寄我玉醅酒白蚶海月君家有欲持就味明日期  
窮羹易覆已反手從事開筵不可辭燕脂秀臉羅前後  
長頸善謳須賸謳只恐老來歡意休

依韻答吳正仲罷飲

君辭予家傾蟻醅自有嘉味須持來青篋絡餅方出戶

金方口人  
卷四十二  
紅妝侑席已邀杯窮愁一飲猶關分側望羣賢不可陪  
靜坐紙窗無所得只將文字眼前堆

送王景憲奉職

清羸將家子苦節自寒儒四壁我何有一錢君亦無下  
灘船亦急聞鴈日將晡行愛青山口人烟事網畝

讀毛祕校新詩

毛公明於詩其系宜善續前示五長篇大須傾幾曲豈  
特元和間欬唾成珠玉



送允從上人還廬山

山高雲在下諸壑藏半空千重萬重翠正望落日中不  
知野僧歸石徑寒易通松間無人掃隕葉如斷髮獨行  
逢莫寒衣裂溪上風

依韻諸公尋靈濟重臺梅

梅要山傍水次栽非同弱柳近章臺重重葉葉花依舊  
歲歲年年客又來雖愛千枝競繁密還嗟短髮已衰頽  
郎官博士留車騎擁蔽脩篁為斫開

和正仲再和罷飲

吳味期君強飲開楚醅因我破愁來何言合美將虛館  
却憶爭妍就捧杯夜霰已先庭雪集單衣難與毳裘陪  
踐盟幾欲驅車去塵事無端日日堆

和韻三和戲示

苓箬畫蛤瓦缸醅海若淮壖各寄來將學時人鬪牛飲  
還從上客舞蛾杯蓬蒿自有蔣生樂珠翠寧容鄭氏陪  
莫計寒暄與風雪古來黃土北邙堆

鄭康成與盧子幹  
同事馬融融後堂

有珠翠之會康  
成不得與焉

喜雪應祈呈權郡通判

臘近冬殘雲未合江南青壠麥休肥誰將太守隨車雨  
一夜從風作雪飛

依韻四和正仲

四和還如九醞醅更醇更美未嫌來相逢莫作兩般眼  
一飲不辭三百杯嵇阮當時無俗慮山王雖貴亦能陪  
如今世態尤堪薄只把官資滿眼堆

袁招飲鄭云自旦  
至暮三百餘杯

雪

朔雲生晚雨臘霰集狂風不數花多出安知天更工漫  
階夜已積萬物曉初蒙誰憶新豐酒乘驢灞水東

宛陵集卷四十二